



17. august 2012

EM 2012/34

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumu-una saqqummiuppara:

**Pisortat ikiorsiissutaannik pisartagaqarniarluni qinnuteqartup pisartagaqartorluunniit pissutissaqarani:**

- **Suliffissani innersuussutigineqartoq naaggaarpagu**
- **Suliffissatut innersuunneqartumut suliartunngitsoorsimappat imaluunniit**
- **Soraarpat imaluunniit suliffik tunniunneqartoq qimaannarpagu imaluunniit nammineq pisuussutigisaminik soraarsitaappat**

**Sapaatip akunnerini sisamani qinnuteqartup imaluunniit imminut napatinniarluni pisortat ikiorsiissutaannik pisartagaqartup aningaasartuutitut aalajangersimasunut kiisalu ataasiarluni aningaasartuutitut ikiorsiissutinik pisartagaqartarunnaarsittalernissaa anguniarlugu Pisortat ikiorsiissutaat pillugit Inatsisartut Peqqussutaannik Naalakkersuisut allanngueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Andreas Uldum, Demokraatit)

### **Tunggavilersuut**

isertungaajunnaarnikuuvoq, tamatta pisinnaasagut naapertorlugit ikiuunnissarput kissaatigigutsigu tungiuinikkut atungartuussutsitta piginnarnissaa. Taamaattumik iluaqutaanngilaq sulilluarsinnaasunik inoqarpat, iluarinnittunik pisortat ikiorsiissutaannik pisartagaqarnissamut, suliffik innersuussutigineqartoq tiguunagu. Aamma taamaattoqannguatsiarpoq.

KNR-ip ataasinngormat ulloq 16. juli oqaluttuaraa Royal Greenland Qasiannuani Uumannamilu suliffissuaatimini sulisussaaleqisoq. Paasiuminaalluinnarpoq, illoqarfinni pineqartuni suliffissaaleqisut amerlammata.

Ilulissaniittup Halibut Greenlandip pisortaata Sermitsiami ulloq 27. Juni oqaatigaa, tunisassiorfinni sulisussaaleqisarnerup kinguneranik, suliffik ullut ilaanni tunisassiassanik tiguisinnaaneq ajortoq. Ullut taakkua suliffiup ullormut 1 mio. koruuninik annaasaqaatigisarpai. Pisortaq naapertorlugu alla ajornartorsiut Halibut Greenlandimut tassaavoq, inuit kommuni aqutugalugu sulisussarsiarineqartut, suliffimminnik paarsinnaasanninnerat.

Suliat ataasiakkaat iserfiginngikkaluarlugit Demokraatini ajoraluartumik paasivarput, pisortat ikiorsiissutaannik pisinnaanermut aalajangersakkat sukaterneqartariaqartut. Imaanngilarmi suliffissaqartillugu sulisinnaalluaraluartut pisortat ikiorsiissutaannik nappateqassasut, suliumannginnertik pisutiginnarlugu.

Suliffeqanngitsunut ikiorsiissutit pillugit Inatsisartut peqqussutaanni takuneqarsinnaavoq sapaatip akunnerini sisamani pisussaajunnaartitsisoqartartoq, tamannalu atulersartuq inuk pisartagalik sulif-

fissamat itigartitsippat imaluunniit sulinngitsoorpat. Siunnersuutigissavara pisortat ikiorsiissutaat pillugu Inatsisartut peqqussutaanni assigusunik aalajangersagaqalissasoq.

Siunnersuummi siunertaavoq inuit pisortat ikiorsiissutaannik qinnuteqarniartut pisartagallilluunniit kaammattornissaat sulilertarnissaannut suliffissamik neqeroorfigineqarsimatillutik, sulilernissamat naaggaarnissaq pissutissaqarsimatinnagu. Siunertaavoq amerlanerit imminut pilersortunngortinnissaat aamma kusanangitsumik inunnik isumaginninnerup iluani illersugaanerup atornerlunneqannginnissaa, illersorniarlugit inuit pisariaqartitsivissortut ikiorneqarsinnaajunarnissaat kiisalu suliffiit sulisussarsiortut sulisussaminnik pissarsisinnaajuarnissaat.

Naggataatigut Demokraatini pingaartipparput erseqqissassallugu, sukaterinissamat siunnersuutiginartut soorunami taamaallaat atorneqartassammata suliffissaaleqisunut sulisinnaalluartunut sulilernissaminnullu piareersimasunut. Eqqarsaatiginngisaannarparput soorlu inuit napparsimasut pinngitsaalillugit sulisinniartarnissaat.

Demokraatini aamma erseqqissarumavarput, soorunami suliffissaaleqisut tamarluinnarmik suliumaneq ajortut suliffissarsissunneqaraluaangamik. Amerlasuut neqeroorut qujamasullutik tigusarpaat imminnut ilaqqutatillu pilersorumallugit. Inuiaqatigiinnit taakku ataqqineqartariaqarput.

Aamma pisariaqanngilaq nammineq pisuussutiginnisaminnik suliffissaaleqisut isiginerlussallugit. Ajornaatsuinnaanngilaq suliffissaaleqineq taamatullu pissuseqartarmata ikiortariaqarpagut sapinnigisannguatsinnik, ikiortariaqartillugit. Inuiaqatigiinnit ikiortariaqanngitsut taamaakkaluartorli ikioqqusariaqartartut matumani siunnersuummi pineqarput.

### **Pisortanut aningaasatigut allaffissornikkullu kingunissai**

Siunnersuutip kommunimi inunnik isumaginninnermi aningaasartuutit sipaarfigineqarnerannik kinguneqassasoq naatsorsuutigineqarpoq, ilatigut ikiorsiissutinik pisussaatitaanngiffiup nalaani tunniussisoqartartussaangimmat, aamma pisussaajunnaartitaasarnerup eqqunnerata kingorna amerlanerit suliffissaminnik innersuunneqartunik tigusisalissammata, taamaasillutillu imminnut pilersorsinnaanerulerlutik.

### **Namminersorlutik Inuitissarsiortunut aningaasatigut allaffissornikkullu kingunissai**

Namminersorlutik inuitissarsiortut malugissaqqooqaat atorfiit inuttaqanngitsut inuttalertarnissaat ajornannginnerulersoq, sulisullu kommunimit suliffissarsissunneqartut suliarortassasut peqqinartumik piomassuseqarlutik kusanartumik naammassisaqarumallutik.

### **Innuttaasunut aningaasatigut allaffissornikkullu kingunissai**

Soqanngilaq